

欽

定

全

唐

文

欽定全唐文卷三百四十五目錄

張巡

謝金吾將軍表

對西陸朝覲判

對字詰判

許遠

祭肅文

祭城隍文

李光弼

辭疾讓官表

達奚珣

太常觀樂器賦

華山賦

并序

劒賦

豐城寶劒賦

秦客相劒賦

華山述聖頌序

對以管聽鳳判

宴濟瀆序

遊濟瀆序

陳希烈

道士蕭從一見元元皇帝奏

請以南華真經宣付史官奏

修造紫陽觀敕牒

李林甫

嵩陽觀紀聖德感應頌

進御刊定禮記月令表

賀克吐蕃安戎城請宣示百寮表

請宣示御製仁孝詩奏

欽定全唐文卷三百四十五

張巡

巡字巡鄧州南陽人

舊唐書云蒲州河東人又樂史太平寰宇記亦云巡蒲州河東人

開

元末擢進士第三以書判拔萃入等天寶中由通事舍人出爲清河令調真源安祿山反巡募豪傑拒賊與單父尉賈贲入雍邱城守雍邱令令狐潮降賊引衆數萬圍城凡四月巡衆纔千餘每戰輒克河南節度使嗣虢王巨屯彭城假巡先鋒俄東平陷賊巨引兵東走巡失外援拔衆至睢陽與太守許遠城父令姚閭等合敗賊將楊朝宗詔拜

巡主客郎中副河南節度使至德二載御史中丞賊將尹
子奇圍之經年城陷遇害年四十九贈揚州大都督

謝金吾將軍表

想峨眉之碧峯豫遊西蜀追駮駢於元圃係壽南山逆賊

祿山殺戮黎獻蹂汙

一作腥羶

闕庭臣被圍四十七日凡一千

八百餘戰主辱臣死當臣効命之時惡稔罪盈是賊滅亡
之日

對西陸朝覲判

西陸朝覲闕月繹之御史劾之非其時不合禮

薦必及時政無墜禮雨雹可禦淒風不流惟乙浚陰是司
將頒肉之列愛侯伐冰之家將當夜頒有此上數句應有闕誤朝覲
無戒且不違於西陸蓋取異於東鄰旣憐申豐將除苦雨
之變翻慚高子不爭靈星之詩御史職在乘驄誠爲直指
有司義乖祭筐猶曰非時徒欲事於煩言得無同於矯舉
罪之則可訴亦難從

對字詰判

甲書字詰所由計功不及日請科罪不伏訴云

紙類不同

甲楷法有聞頗齊刀筆之吏象形自業偏在寫書之官不能殺竹惟青臨池盡黑當年有立應已盈裾計日不移無慚尺牘今乃字詁是事日課有違左氏門庭雖多筆硯稚川史籍不滿巾箱曾莫負於五車徒見司於雙管以是會意雖則麾肱不能中程何爲當理今之簿訴將俟片言欲遲單父之書須辨洛陽之紙然則類之大小猶或可問刑之出入於是乎在

許遠

遠杭州鹽官人右相敬宗曾孫初從軍河西爲磧西支度

判官劾貶高要尉安祿山反召拜睢陽太守累加侍御史
本州防禦使賊將尹子奇攻城遠與張巡姚閼固守城陷
被害贈荊州大都督

祭燾文

太一先鋒蚩尤後殿蒼龍持弓白虎捧箭

祭城隍文

智井鳩翔老堞龍攬

李光弼

光弼營州柳城人起家左衛親府左郎將襲封薊郡公安

祿山反郭子儀薦其能詔攝御史大夫持節河東節度副
大使知節度事尋加魏郡太守河北採訪使范陽大都督
府長史范陽節度使肅宗立更授戶部尚書同中書門下
平章事至德二載遷司空拜鄭國公乾元元年兼侍中爲
天下兵馬副元帥上元元年拜開府儀同三司中書令河
中尹晉絳等州節度使進太尉寶應二年進封臨淮郡王
賜鐵券藏名太廟圖形凌烟閣長慶二年薨年五十七贈
太保諡曰武穆

辭疾讓官表

臣自去月十七日舊疾發動有加無瘳至今月五日臣自量氣力恐至不起謹忍死口占陳露上聞臣受國重任荷國厚恩自陛下臨御以來方隅多故加以疾病不任扶持竟未獲趨拜闕庭瞻奉宸極忽此危亟氣候奄然將冥沒聖代長辭白日撫心內痛割切五情且鳥之死其聲九哀况臣繫心聖朝結戀慈母倚枕西向覲謁永遙所以循環晷刻心腸斷絕臣以素無成效累加封邑每經陳讓不蒙允許今臣將死覲冒猶存若使無功之子嗣守素封臣赴下泉亦不瞑目况生人凋弊國用不充軍興所須實資錢

穀謹上前後所賜實封二千戶請歸之有司庶裨萬一蓋
臣宿素必守之誠伏惟聖慈特賜臨照行營兵馬使已下
至將士及資糧營田所繇等並令恭守所職伏聽進止仰
天瀝懇誠切氣微俛首嗚咽申吐不盡不勝哀迫痛戀之
至

達奚珣

奚珣開元時官禮部侍郎汧安祿山僞命

太常觀樂器賦

昔者聖人之作樂也將以動天地感鬼神節風雅導人倫

樂假器而成用器以樂而見珍或採孤篠於鄒魯或收浮
磬於泗濱或斷彼金石或制自陶鈞被諸大道輝光日新
逮乎上皇云謝戰國相滅雄殺氣於五兵崩禮容於八列
大樂之器斯焉是缺剝極則賁天臨我皇化東戶而咸若
歌南風而有光觀奮豫而崇上帝舞干戚而柔大荒樂器
成列盈乎太常客有覩而駭者曰國之盛事殫所未識雅
象純殷叢光翕翹樹羽紛纒崇牙削劣玉管清通瑤琴古
色朱絲疏越之制雷鼓靈鼉之飾青笳闕列於軍容畫角
融怡於武力故能頓應輦張祝敵猛獸赫怒而擎鐘金人

嵌巖以負簾鸞笙在目疑髣髴於周王鳳簫可吹紛肸蠭
於羸女況復天球曜逸金銳蒙鴻大籥清警虛籟生風怒
齊竽之濫吹壯秦缶之爭雄稽爾旣倬猗歟載豐匪天子
之明德孰以成其衆美總四夷而徵妙越六代而高視思
其鏗鏘嘈噴清暢逶迤五色成文而不亂八風從律而不
虧窮高遠而測深厚故乃盡美而在斯

華山賦

并序

太華之山削成四面方直者五千餘仞蓋嶽之雄也往因
行邁望之不及今來何幸作尉於茲因而賦之以歌厥美

華山維嶽羣嶽之雄天開厥狀神致其功昔與襄山連岡
不絕河水長注橫流曲折神元再造拓崖而兩分仙掌常
存倚天而迴列其後多歷年所至於夏王窮地絡正乾綱
綠甲之功旣就元圭之業有光定我祀典因爲舊章同夫
三事偉哉煌煌徒觀其倚伏而起削成而峻作秦塞之高
標爲豫州之巨鎮其南接楚其北臨晉嶽乎數都之間豈
惟直上者五千餘仞遠疑將適近若將騰氤氲綠潤霍霽
青凝發地壁立連天石稜披重霄而自致與元氣而相陵
旁望羣山兮盡爲幽側猶夫南面兮用資峻極巍巍乎掩

夏雲之奇峰蒼蒼然合秋天之正色近壓關輔載樞京國
此其所以爲嶽者也若乃人寰不遠勝氣常清石含古色
泉落秋聲懸巖蔽虧謂乾坤之闔闢洞壑幽邃汎雷雨之
滿盈怳怳乎又似龍虎潛伏鬼神含精伊彼崇林望之盡
目參瀨氣而森秀倅斷山之遙矗仙草殊品靈花異族不
以無人而不芳香風灑乎函谷皆負靈造是潤是黷具物
靈繁故難詳鞠蕭條世俗髣髴神仙玉女明祠星壇尚在
羊公舊室石榻常穿霧雨迷處雲臺巍然則知大象所存
何有於古列真攸萃寧獨於先國家南正司天北正司地

人神不擾方嶽定位森森象設之若生懔懔威稜而可畏
宗伯制禮巫咸視事殺氣每登駢剛必備蓋所謂敬而無
黷厲夫精意此則邦之禮物也受命如響依人而榮攸歆
盛德載答嘉生不憊旬時作爲雲雨白漿旣挹黃玉斯睹
隕止如山永康中土此則神之叶贊也揔被山嶽非無壯
麗或隱峰於羣嶺或結根於荒裔空聞象外之談何貴人
間之世而我直兩都之大道當三條之正中偏近日月高
謝紛濛通天之氣成天之功鑿輅常幸聲明有融能事無
爽揚言莫窮舉天下而爭長故難可而比崇

劒賦

代有劒兮物之至珍精鋼百鍊處匣千春含光匿耀守靜
全真蘊切玉之姿咸稱往歲呈斬蛇之銳幸在今辰至如
歐冶素蘊風胡久委許提拔而非遙期磨礱而在邇蓮鍔
熒煌思綠水之是投霜鋒煜爚諒碧天之可倚孰云巨闕
亦曰龍泉借衛身而用光眉壽將行佩而永保流年俯而
察乃白光略地仰而觀則紫氣射天若乃取舍從人沈淪
委質埋厚地之聲有年望司空之來何日擊兕之名已彰
決雲之勢不失大哉寶劒之神用等天地而齊畢

豐城寶劍賦

劍之利者有豐城之寶鏐夫其始也赤山破邪溪涸洪鑪
洞融金景煽爍雖發揮於人事乃兆朕於天作爾其爲狀
也鍛霆電明秋水殺氣森映光輝四起歐冶失律風胡愕
視豈徒決浮雲絕地紀若斯而已矣爾其大運迴薄陵谷
推遷東南地沒不知夫數千百年騰精動地直上衝天斗
牛之間夜雄雄然異金陵之浮王氣同寶鼎之在汾川本
知浮精粹剛決必備明而用晦者君子之時義窮而待達
者丈夫之志事兼此數德難乎見棄知我者寡大賴張公

每讀舊書多茲感通不覺毛髮盡樹起雷息於胸中迨乎
發蒙泉開祕匣文積幽翳上藏鱗甲磨礪畢今見文章搖
白日兮星煌煌鋒稜可畏動人膽表裏分明照眼光黃金
裝兮綠龜飾荷提攜兮耿霜色豈辱命於洪造冀成能今
武力君其試將倚天外不日爲君清絕塞苟軍國之用在
豈能雌伏於一代

秦客相劍賦

以決浮雲清絕
域通題爲韻

有懷其寶而未別候以其時而自絕始藏用而有疑終因
人而一決蓋時有遇否非事有工拙願一二於擊轅之歌

左右以相劔之說於越之君以五劔聞方潛神以閉匣非
有意於決雲且切白玉其猶泥斷截蛟龍忽若簪泛夫以
中庸之近者惡識天下之良劔有客來越其至自秦心以
通於物理鑒有邁於人倫昔也聞風而悅今爲觀國之賓
以天機之見明利器之因天氣得中而不易金精順理而
無逆翼乎秋水之欲波渙乎春冰之將釋陽散陰漫霜鋸
雪脊好勇者不能禦其折衝善說者不能離其堅白滿谷
之馬未可齊乎此價傾城之金安能賣乎此客況非景罕
匹流星莫闕八字歐冶之術爲優此名器因而有作明至寶

不得無妄劒非人而何識人非劒而何相雖鍛鍊於良工
皆等衡於哲匠劒之能可以相著士之用可以劒明抱識
者闕一字乎牽復藏器者以其彙征願以小人之道而進期
君子之鑒惟清重曰析薪如之何匪斧不克求劒如之何
匪相不得純鉤之器秦客所識非常人之區域

華山述聖頌序

序曰懸象著明莫大乎日月我聖人之文也發祥儲祉莫
大乎神祇文之所繇興也原夫天作太華氣雄羣山秉靈
伊何受命如響自坤元之所開拓虞帝之所巡遊祀典雖

存宏圖蓋闕洞陰陽之不測其惟大聖歟於是藻翰自天
發揮神化建碑於廟以光寵焉乃命朝英實司其事經始
勿亟庶人子來徒觀其神輸坤珍美石次玉追琢之際厥
聲泠然磨礪之後其光洞納樹之平地巖若斷山六龍盤
薄糾其上羣神羅立負其下藝事旣畢宸章乃開竊以洪
鑪大造之時天動地業祕錄聿來之日風搖雲起詞義至
廣含元氣而運行翰墨至精吐奎星而飛動剛柔相錯神
妙無方合而五光照離而萬象列宇宙之間粲如也由是
發巖巒之氣色益祠廟之風稜不怒而威有來加敬蓋因

大君之一顧也寵秩榮幸不其至哉初有司以法駕時巡
路直斯地將選巨石先期底功天意若曰夫人神之主也
嚴神以爲人也今稽事未已工徒復興人儻失業神將何
據方待歲暮以須後圖粵若碑版業乎刊刻通其變則人
不倦節其用而財不傷俾夫役者逸於從事天之臨下其
道有赫曲成萬物何往非宜時厥使臣乃昌言曰國之大
事在祀神之所歆在德以德舉事吾君有光比夫周銘弁
山存乎車轍馬跡漢祀少室蓋欲遙興一作興輕舉至誠逮
下可同年而道哉頌聲未作詞客之過小人固陋遊聖難

名實賴文宗繼其不逮敢託呂補闕向爲之頌云

對以管聽鳳判

乙以管聽雌雄之鳳而不合將罪之云中國無
竅均者

鳳凰于飛聲中律呂雌雄是聽道在伶倫通乎忽微揆彼
幽蹟瞻言乙也忝跡於斯豈術數之未精而飾情之有訴
且軒轅已降歲序茲湊推律者寧止於一家揆竹者無聞
於絕塞遐求嶰谷近捨金門荀勗聲高懸同此設京房識
遠有愧其能旣謝知音宜從寘罪

宴濟瀆序

新安主簿高侯知名之士也自角巾私第居多散逸不遠
伊邇薄遊於畿濟源宰寇公此侯之舊也乃昌言曰敝邑
褊小何以娛賓是用戒朋遊選休暇總轡出郭頓夫濟瀆
焉昔陶唐宅天洪水方割夏后敷土沈災克清瀆之稱位
斯焉肇起夫其含靈厚載託勝中州初若爭雄截黃河而
徑渡去而有禮揖滄海以朝宗均祀典於通侯蓋取諸此
然後命舟子爲水嬉垂安流窺洞穴烟華釣浦彩徹金潭
表裏皆明下觀鱗石風雨時霽遙影一作映雲山荷芰香而

酒氣添濃洲渚隱而榜歌聞曲船移鳥下岸靜蟬鳴沿流
溯洄坐得桃源之趣矣況時當大夏氣惟溽暑沸海焦陵
流金爍石獨有茲地勢隔人寰高樹森沈窅若無日修竹
陰映蕭然納清徘徊久之體靜心愜思壯士以翻景與諸
公爲窮年不覺晴雲向山涼露霑夕對歸騎而將散負幽
情而更多如何誌之詩可以興

遊濟瀆記

軹縣西北數十里濟水出焉稽乎舊章可得而道自河浮
綠甲帝命元夷疏畎澮而正乾綱鏟陵巒而通委輸所謂

四瀆資我而成彼三川者或在幽僻遠而見奇伊何足貴
豈與夫體清淳之氣據函夏之中平地開源分空正錄表
裏皆淨似若非溪舟楫旣加乃知無底沖和自抱斯君子
之量歟從此而東截河通汶不以險阻殊其勢不以清濁
汨其流終能獨運長波滔滔入海沈潛剛克斯君子之量
歟意者洞幽明貫天壤包荒萬類出入無間形與化遊復
歸於道不然何其異也雖金火交作變通殊制而浮沈之
事亦無捨旃國家南正司天北正司地以爲百神授職則
陰陽無錯繆之災羣望聿修水土得平均之序欽若稽古

道豈虛行闕宮有恤象設如在流目一望森森動人覺毛
髮之間風飈四起然後以諸侯之禮禮而祀之至於下人
日用蘋藻吉凶悔吝則以情言且神道無方豈存於此而
物類相召或有憑焉盍溜潛通動植滋液高樹直上百尺
無枝虛篁下清四時一色意隔人世空聞鳥聲陽浦先春
草心方變敝岸猶冷苔生未穠紅晶落而天下陰青靄凝
而衆山暮留賞無厭歸情坐忘中途載懷歷歷在眼庶記
豪翰光昭厥美云

陳希烈

希烈宋州人開元中常於禁中講老易累遷祕書少監李
林甫引爲左相兼兵部尚書同知政事封潁川郡開國公
楊國忠嫉之罷知政事守太子太師祿山之亂與張垠達
奚珣同掌賊機衡肅宗返正賜死於家

道士蕭從一見元元皇帝奏

伏見太清宮道士蕭從一云今日五更欲於殿上焚香行
至三清門忽有一片紫雲從空下兼有異常音樂忽然如
夢身心驚駭見空中有異人兼仙童玉女謂從者曰我是
元元皇帝可報吾孫汝是上界真人令侍吾左右吾冥使

天匠就助成就訖長衛護汝受命無疆災害自除天下安
樂言訖隨雲氣便入殿門謹案諸道士學生皆稱今日凌晨
於三清門外見道士蕭從一鞠恭唱喏三四聲有紫雲
及音樂移時不散伏惟陛下虔誠奉道福祐所歸置玉石
真容侍聖祖左右仙樂下慶天將助成紫雲徘徊移時不
散空中有語所報非常言聖壽之延長億萬載之無極伏
望宣付史官

請以南華真經宣付史官奏

臣伏見今月二十日恩制以莊子號南華真人書曰南華

真經所說皆理身之要發明奧義有十萬元言祖述道經
含五千微旨昔常侍講跪演經文至於七篇陛下顧謂臣
曰其篇有養生主已悟長年之術其次有德充符豈無非
常之應臣稽首對曰陛下德充於內符應於外發言之後
必有大慶以應之後篇之中所謂應帝王之篇是也今元
元皇帝果降靈符彰寶祚無疆之福含真人知來之旨尊
以稱謂陳其象設希代之禮曠古未聞臣於此經宿願深
重受持讀誦三十餘年作禮焚香庶裨聖化獲逢殊慶倍
百常情望宣付史官以昭靈應

修造紫陽觀敕牒

茅山紫陽觀右臣奉敕與修功德使元靜先生李含光內
謁者監程元暹等同檢校修造前件觀並了并設齋謝上
訖去年九月二十二日錄奏奉敕宜付所司修造觀迴殘
錢二百四貫二百八十五文右修造外有前件迴殘爲造
觀成附奏奉敕便賜觀家充常住郡司已準數分付三綱
訖臣又與觀主道士劉行矩等商量請於便近縣置一庫
收質每月納息充常住其本伏望長存觀額及徒衆先受
地頃畝並足今載所收納苗子支來載糧亦充并觀內先

有奴婢四人小牛六頭車一乘見在右臣今對所管縣官
及三綱檢責觀內先有前件產業數勘覆並同其糧食已
有歲支來春請加營種觀內什物五行等右觀家先貧什
物數少昨修功德使程元暹奉敕支供黃籙齋外有迴殘
銀一百兩令臣分付觀內徒衆將回市所欠什物等並令
充足觀內松竹果木等右臣伏以觀在茅山羣仙所集院
宇雖則華壯松竹先多欠少比爲非時未由種植請至開
春專令栽蒔并於南池種藕庶望周徧謹具以聞丹陽郡
太守林洋奏件狀如前

中書門下牒丹陽郡牒奉敕宜依牒至準敕故牒天寶八載正月八日左相兵部尚書陳希烈左僕射兼右相林甫

李林甫

林甫高祖從父弟長平王叔良曾孫初爲千牛直長開元中累拜黃門侍郎禮部尚書同中書門下三品加銀青光祿大夫中書集賢殿大學士兼領隴右河西節度加吏部尚書天寶初易官名爲右相遷尚書左僕射加開府儀同三司十一載卒贈太尉揚州大都督

嵩陽觀紀聖德感應頌

域中之大有四道爲之首而王者統焉方外之人有五神爲之首而聖者用焉非道也無以致神非神也莫能感聖自炎師水玉軒訪峒山宵藐汾陽徘徊河上且猶私一己之利屈萬乘之尊或得之而不存或求之而不及則未有宏心六合元化被於海隅滌覽九重異人臻於闕下密傳仙契潛役神功端拱紫庭坐進金鼎如我開元天寶聖文神武皇帝之至感也蓋德邁者其業崇道宏者其化博上初戡巨難纂睿圖以爲唐虞盛理教人而已矣乃昭禮物考經志於是乎帝典王綱罔不畢備及夫一戎夏致雍熙

又以爲軒昊上德恭已而已矣乃敦清淨復淳樸於是乎
偃甲垂衣示於無欲故載歷三紀功包九皇乃時有真人
方士不召而至者儼然而進曰臣聞昔者太初之先也嘗
有受命握符一君千歲後代聖人順其外爲封禪修其中
爲導養故玉檢有不死之名金丹爲長生之要五三以降
茲道蔑聞陛下承紫氣之眞宗接黃神之遠運玉檢之文
已備金丹之驗未彰天將授之其在今矣上覽其議而告
之言朕聞神丹者有琅玕雪霜三化五轉太乙得之爲上
帝之伯元君得之爲下教之尊必將假無爲之功任自然

之力乃可就矣於是考靈跡求福庭以爲嵩陽觀者神岳之宅真仙都之標勝直天中晷影之正記烈祖巡遊之所抱汝含潁風交雨會陰陽之所烝液偃佺之所往還丹竈琳堂往往而在乃命道士孫太沖親承密詔對授真訣一日披圖於天府二之日陳醮於山壇然後俾太乙啓鑪陵陽傳火積炭於廡下投藥於鼎中固以扃鑰窒其窗戶隙光不容人跡罕到自河尹官屬邑宰吏僚目對封泥手連印署太沖乃與中使薛履信銜命而東涉海沂過蒙羽行且千里歸已十旬然後剋日聚觀開封發印餘燼未滅

還丹赫然則已六轉矣明年移葯於緱氏山升仙太子廟
其役制之功神異之效又如初焉每至降御詞陳祝冊紫
泥素表倏忽飛天元酒玉盃繽紛移座祠官睟眙供吏驚
呼靈貺昭答有如此者其餘瑞鶴卿雲祥光祕語匪朝伊
夕不可勝記按中丹經云金華符成威光鼎就則有朱鳥
呈異白日激輝斯非類乎九轉既畢馳驛以獻聖上方滌
慮穆清齋心虛白神期應會如合契焉於是三事百僚奉
觴稱賀曰陛下撫羣黎而歸壽域上真降殊休而報聖德
神丹一御與天無極且夫宏化至道先烈也還風太初昌

運也異人委質聖感也靈藥薦壽天符也此四者皇圖帝
載所未聞焉微臣預春秋之徒忝申甫之地上清事隱非
魯冊之可徵大洞功成豈周頌之能紀強銘琬琰永播乾
坤其詞曰

太古兮上皇千歲兮一君自軒轅兮獨往遂歷代兮無聞
有唐兮英聖六葉兮十紀維天寶兮合符故淳風兮變始
嵩有峯兮潁有瀾交靈氣兮集仙壇資聖壽兮效神丹神
丹御兮福庭會虹蜺旗兮紫雲蓋臨萬邦兮彌億載

進御刊定禮記月令表

臣聞昔在唐堯則歷象日月敬授人時降及虞舜則璿樞
玉衡以齊七政夏后則更置小正周公則別爲時訓斯皆
月令之宗旨也逮夫呂氏纂習舊儀定以孟春日在營室
有拘恒檢無適變通不知氣逐閏移節隨斗建泊乎月朔
差異日星見殊乃令雩祀愆期百工作沴事資革弊允屬
宜更昭代敬天勤民順時設教是以有皇極之敷言親降
聖謨重有刪定乃依构建爰準攝提舉正於中匪乖期於
積閏履端於始不爽候於上元節氣由是合宜刑政以之
咸序遂使金木各得其性水火無相奪倫蓋所謂順乎天

而應乎人者也乃命集賢院學士尚書左僕射兼右相吏部尚書李林甫門下侍郎陳希烈中書侍郎徐安貞直學士起居舍人劉光謙宣城郡司馬齊光又河南府倉曹參軍陸善經修撰官家令寺丞兼知太史監事史元晏待制官安定郡別駕梁令瓚等爲之注解臣等虔奉綸音極思何有愧無演暢之能謬承載筆之寄義深罕測學淺無能莫副天心空塵聖意謹上

賀克吐蕃安戎城請宣示百寮表

伏以吐蕃此城正當衝要憑險自固恃以窺邊積年以來

蟻聚爲患縱有百萬之衆難以施功陛下親紆祕策不興
師旅頃令中使李思敬曉諭羌族莫不懷恩翻然改圖自
相謀陷神算運於不測睿略通於未然累載逋誅一朝蕩
滅又臣等今日奏事陛下從容問臣等曰卿等但看四夷
不久當漸摧喪德音纔降遽聞戎捷則知聖與天合應如
響至前古已來所未有也請宣示百寮編諸史策

請宣示御製仁孝詩奏

伏見陛下因太子生日撰仁孝詩障子并書臣等伏以宸
章煥發睿札凝輝懸日月而齊光自雲霄而下濟驚心靡

據動色相歡太子稟自生知備承聖訓沖姿有裕令望夙彰陛下示以義方形於翰墨爰於誕育之日勗以仁孝之經上揚祖宗之美傍考天人之際錫類所宏教義斯遠足可發揮前古垂範將來凡在衣冠之流咸知父子之道豈比周稱教論造齒胄於上庠漢寵元良但招賢於望苑王化之本實此知歸人倫所資罔不申勸臣等愚陋謬典樞衡特奉鴻私幸覩殊貺捧天書而竊抃仰聖澤以無寧無任悅豫之至仍望具寫六章頒示中外兼編諸簡策傳之不朽

欽定全唐文卷三百四十六目錄

新華出版社藏書

楊國忠

破吐蕃獻俘表

王鉷

讓起復表

第二表

請捨宅爲觀表

賀蘭進明

論房琯不堪爲宰相對

欽定全唐文

卷三百四十六

目錄

中華書局影印

西楚伯王廟頌

并序

咸廩

廩新唐書
作廩業

華嶽精享昭應碑

劉長卿

冰賦

湘妃詩序

首夏于越亭奉餞韋卿使君公赴婺州序

仲秋奉餞蕭郎中使君赴潤州序

張僧繇畫僧記

唐睦州司倉參軍盧公夫人鄭氏墓誌銘

祭蕭相公文

祭崔相公文

祭閻使君文

又祭閻使君文

祭董兵馬使文

祭故吏行官文

欽定全唐文卷三百四十六

楊國忠

國忠太真妃從祖兄本名釗元宗爲改今名因諸女弟得
召擢金吾兵曹參軍閑廐判官累遷京兆尹兼兵部侍郎
自請領劔南節度俄加本道兼山南西道採訪處置使拜
御史大夫領吏部代李林甫爲右相兼文部尚書集賢院
大學士監修國史崇元館大學士太清太微宮使封魏國
公徙封衛冊拜司空安祿山反以誅國忠爲名元宗幸蜀
國忠從至馬嵬兵士爭刃之梟首以徇

破吐蕃獻俘表

臣國忠言頃以南蠻閣羅鳳敢背皇恩吐蕃與其潛謀欲於瀘南結聚窺窬越嶲草竊昆明繇是西山諸郡及八國子弟知其狡計同請討除臣當戎行祇奉睿略破吐蕃雲南救兵六十餘萬屠拔隰州等三所大城擒俘虜六千三百臣以劒山迢遞不可盡來遂簡丁壯千餘并投降首領昨三日於勤政樓奉獻已降殊恩臣又以男女口二百人六日於躍龍門進納陛下以生成之德不限華夷詔臣曰夫王者之義子育爲先每行千紀之誅嘗軫在予之念吐

蕃遺孽頻有負恩其君則然其人何罪且全其生理遂彼
物情其所獻口并宜釋放遞還本國以直報怨於是乎在
微臣於是何幸親奉德音聞所未聞以忻以感伏惟陛下
含宏庶品康濟羣生大敷恩信下格昏迷自皇王以來未
有如今日者也天下幸甚豈惟諸戎特望宣付史官頒示
中外

王鏐

鏐太原祁人開元時累除戶部員外郎天寶中拜御史中
丞遷戶部侍郎加銀青光祿大夫封太原縣公兼殿中監

十一載因邢緯謀逆詞連鋹弟鐸賜鋹自盡

讓起復表

草土臣鋹言伏奉制書復臣御史中丞餘並如故恭承睿
獎五情震越臣中謝臣弱喪所生不能自立慈親撫育得
以成人所恨終身號慕無及今纔踰卒哭寧冀生全聖澤
曲流天光特照記臣於苦幽之下起臣於風憲之前知臣
轉溪萬死難謝誓將糜粉上答殊私豈固禮經輒稽嚴命
但臣自丁艱疚日漸尪羸料形體未堪驅策徒招謗議
無振紀綱伏乞聖恩舍憐俯矜覲冒容臣歲月抱釁私門

稍能支持不敢辭訴無任感懼荒迫之至謹詣朝堂路左
奉表陳乞以聞

第二表

草土臣鋌言臣迫以私情銜恤上訴曲垂聖禮敦喻彌渙
恩重難移心孤易殞哀榮之極肝腦何酬中謝臣伏在糞
土之中苟偷朝夕之命殊私薦及特蒙收獎授以風憲委
以澄清臣雖至愚豈不知天慈所屬使臣卽蹈湯火若登
雲霄安敢固辭輒拘常限但緣荒瘵忽忝衣冠自審殘生
必招官謗謹冒死重請不勝戰越無任哀懇荷戴之至謹

詣朝堂路左奉表陳乞以聞

請捨宅爲觀表

臣聞道本無爲虛而必應行之者時乘六氣得之者壽越
二儀伏惟開元天地大寶聖神文武應道皇帝陛下高居
衆妙濶契重元降自三清元君俯爲萬方聖主竊見朝之
上宰是曰大賢首學真宗先開道觀奉揚慈旨布淳化於
蒼生恭啓福因延休祐於皇極臣昧於聞道不敢思濟瞻
言報恩寧忘竊比且臣孤立明主所知竭力効官義惟守
死捐軀奉國誓不偷生所賜榮寵所蒙任使不因人力特

出聖衷加以前後糾彈頻

闕

抵忤公言成謗恐不自明直

道招愆甘爲已分陛下聖明先覺真僞立分燕客上書遙知是詐漢臣引過逾察其忠蒙獨照於聖心免獲罪於浮議嘗憂萬死讎致九遷伏念殊私將浚罔極徒申荅效無補萬分臣舊宅在城南安化門內道東第一家祖父相傳竹樹猶茂已更數代垂向百年同蕭何之買田誠爲偏僻異晏嬰之近市稍遠囂塵臣於此中選其勝處減兼官之祿俸迴累賜之金帛盡除遺堵創建遵堂廊宇旣成功德將畢伏乞俯矜丹懇特降皇慈因誕聖之辰充報恩之觀

捧迎仙榜光映敝廬每至三元八節之時天長乙酉之日
臣得澡雪紛垢奉持齋戒一心至願稽首尊容獻福聖躬
永資寶算千生頂戴萬劫歸依雖螻蟻之負細塵豈能裨
嶽而烏鵲之銜微毳有志填河儻蒙睿澤曲流愚誠俯遂
仰望許臣諸處招灼然有行業道士二十七人常修香火
無任感恩荷德之至

賀蘭進明

進明開元十六年進士肅宗朝歷北海太守移南海太守
攝御史大夫充嶺南節度使旋正授御史大夫河南節度

使後貶秦州司馬

論房琯不堪爲宰相對

琯昨於南朝爲聖皇制置天下乃以永王爲江南節度潁王爲劔南節度盛王爲淮南節度制云命皇子北略朔方命諸王分守重鎮且太子出爲撫軍入曰監國琯乃以支庶悉領大藩皇儲反居邊鄙此雖於聖皇似忠於陛下非忠也琯立此意以爲聖皇諸子但一人得天下卽不失恩寵又各樹其私黨劉秩李揖劉彙鄧景山竇紹之徒以副戎權推此而言豈肯盡誠於陛下乎臣欲正衙彈劾不敢

不先聞奏

西楚伯王廟頌

并序

我巨唐天寶之敦牂歲月壯旬八日而四郊不雨赤薶擢
穎而始花素稻含英而未吐心有螟節有賊根有蠹葉有
騰噫十數載間荐傷於稼穡居則懸磬散爲浮食千里百
城老農老圃奔走於道路相顧而言曰昔者灾由是也今
未及字關一爲灾也謂之何哉進明聞而避正堂以自咎卽
齋次以詢謀乃命參軍王皓之告於伯王之廟十九日辛
亥初拜恍兮若有所見忽兮若有所聞風闕一雲蒸雷吼

電缺鞭頂視之魃斲翰飛之虵殄燼蟲闕三停闕一玉而

煎砂水刑溪盈川本今闕一字而隘陌君闕三兮整衣冠以

闕十其闕三而環周膏塗於疆場之內闕一禦闕三祀闕一

字有闕三虎踞龍蟠鸞鳳之所翔集闕一梧修竹青翠崢

嶸濬湯池稜石城停午無影虛聞籟聲雙闕霞張閼宮有

恤徒三萬車千乘二矛重弓朱英綠滕虹旌日羽饒歌劒

舞若昭震於岡陵烏虜羸政焚燒詩書胡亥繼之以昏虐

當是時也豪傑並起而攻秦王以蓋代之才拔山之力啗

啞叱咤橫行於天下破釜沈舟隳城坑卒沛公謝罪子嬰

伏誅豈樓煩之徒轅門諸將目不敢視手不能發而已生
則伯主歿爲貴神山川出雲天降時雨善長嘉會事幹義
和羞爾餽烝聿求多福灾蝗瀦鬼飛遁於犬牙之外雖上
德不德而好是正直皇皇彼天孚祐下國春秋匪懈享祀
不忒適變無窮永代作則銘曰

雷爲戈兮雲爲旆天殷殷兮雷聲噬光明下濟兮澤露霑

咸廩

廩

新唐書
作廩業

平陽人官華陰縣尉景雲中殿中侍御史內供

奉開元初官大理評事集賢院修撰遷直學士坐事左遷

餘杭令

華嶽精享昭應碑

夫神其止也虛其行也直是以感生焉夫祀其事也大其
馨也德是以福生焉維嶽有高居兌曰華天作峻極厥仞
五千降靈集祉密邇上國故風雨時若必應休明玉帛之
享亦豐其報致天人之和者功莫大焉歲在涒灘我皇帝
以開元嗣極今八載也文德被武功成垂拱而天下理續
服而庶邦正於戲聖之配天不逆災祥之數而務修其德
天之降福或彰譴告之符而終與其善是以成湯興而炎

嘆邁周宣懼而頌聲作間自日在奎雷始電迨乎畢春氣
達萌芽山川如焚密雲不雨千耦適野胥病於失時百室
崇墉將空於成歲我皇畏昊天之命憫烝人之艱自郊祖
宮靡神不舉乃分命舊相尚書許國公蘇頲以瑞祝之辭
旅於西嶽將以蒙嘉氣獲豐年公時膺保衡代修袞職克
承先正對揚王休天子以才難九人允歸同德公是用僉
諧八座懋廣疇咨有文章焉有禮樂焉旣享冢位乃司宗
伯實佐和邦敬恭明祀爰屆爰處威儀孔將閔是亭廟有
來斯啓州命長史河東薛縉俾焉協事於外宗人相禮展

器執書告備於內肅雍萃止蕭艾並作幣尊六號王用兩
圭焚燎舉而禮容祇若昧爽交而神光有粲粲三月庚申
陳薦請也公已事復命式遄其歸時厥翌日旋於闕下車
麟麟而響止履鏘鏘而聲入則已渰周四溟澍洽千里拜
獻純嘏天臨在歡嘉公克誠神用影響制書褒賚束帛有
差旣禱而祠古之義也吾不與祭帝有怒焉乃申命秩宗
寵終厥事則有牲牷樂奏之備以昭配焉癸卯告賽如前
禮夫陰陽不測至妙也因變感情至教也六府三事大功
也四望六宗大禮也后王卿士如彼歲月其道不易時維

康哉蘇公乃言曰惟我后之德格於上下神哉其霈令茲
巨人既可述已於是重費以謀始因物以書伐倬彼金石
載刊其陰俾夫後之敬事者知景福之攸在其辭曰

於鑠太華降神西峙惟王荒之配天有祀雲雨成物馨香
叶祉明明天子禱於愆陽肅肅蘇公王命是將克誠攸享
離畢其滂年之用康祀事惟政非昵非假禮崇其敬祠而
報焉以永終慶惟靈感和幽贊而生有豐者石刊之則貞
蘇公作頌孔碩其聲

劉長卿

長卿字文房河間人開元二十一年進士德宗朝爲監察御史檢校祠部員外郎轉運使判官知淮南鄂岳轉運留後終隨州刺史

冰賦

水無心而清冰虛已而明始則同體終然異名水之動我變以靜水之柔我變以貞任方圓而能處其順在高下而不失其平北陸初凝結而爲冰東風始起融而爲水與時消息隨物行止水也不知其所然冰也莫知其所以何推運而有恆乃忘情而合理觀乎外示貞堅內含虛澈無受

染以保其素無納汙以全其潔比玉而白不爲蠅玷比月而明不爲蟾缺瓊樹色奪瑤池光發變寒日之清瑩帶陰天之肅殺爰自止水遍於山川萬穴俱閉長波寂然皎皎彌靜戔戔遠連如雪覆地若雲披天雲之凝兮佇長風而可掃雪之積兮向太陽而莫全豈同夫氣之所感物莫能遷勁飈夕寒我力增壯晴景朝暖我心猶堅其堅伊何履霜斯至其薄伊何臨泉是畏君子用之以馴致其道觀之而不驕於貴二之日始鑿命虞官三之日始納享司寒天子陳禮容賦幽風大啓冰室獻於王宮氣肅雲陞寒生衮

龍闢九門於月下列千官於鏡中頒衆位取飲以受命御
至尊得象於朝宗若君莫之求臣莫之見則淡山窮谷詎
可得而加薦苟藏之不周用而不徧則災霜害雹如有待
而爲變人或愛我清人或愛我淨旣潔其迹亦堅其性水
之冰生於寒人之冰生於正無棄其道吾將何病

湘妃詩序

山海經曰洞庭之山帝之二女居之郭璞云天帝之女處
江爲神卽列仙傳所謂江妃二女也劉向列女傳曰帝堯
之二女長曰娥皇次曰女英堯以妻舜于媯汭舜旣爲天

子娥皇爲后女英爲妃舜死於蒼梧二妃死於江湘之間俗謂之湘君湘中記曰舜之二妃死爲湘水神故曰湘妃韓愈黃陵廟碑曰秦博士對始皇帝云湘君者堯之二女舜妃者也劉向鄭元亦皆以二妃爲湘君而離騷九歌既有湘君又有湘夫人王逸以爲湘君者自其水神而謂湘夫人乃二妃璞與逸俱失也堯之長女娥皇爲舜正妃故曰君其二女女英自宐降曰夫人也故九歌謂娥皇爲君女英爲帝子各以其盛者推言之也禮有小君明其正自得稱君也按琴操有湘妃怨又有湘夫人曲

首夏于越亭奉餞韋卿使君公赴婺州序

今年春王正月皇帝居紫宸正殿擇東南諸侯以我公爲少光祿自姑蘇行春於東陽愛人也頃公之在吳值櫓槍構戾南犯斗牛波動滄海塵飛金陵公夷險一心忠勇增氣四面皆敵姑蘇獨靜臥甲霜天洗兵寒水竟使浙西士庶不見烟塵公之力也朝廷聞而多之以爲姑蘇之人已理東陽之人未化是拜也宜哉卿月旣明仁風載清出入數藩從容九棘在虞秦而皆智豈滕薛而異名頌聲洋洋實此行矣于越便道金華前山梅花過時槐色猶在白雲

芳草盡入詩興公實秉文律將爲詞雄逶迤退公知八詠
之有繼作矣

仲秋奉饒蕭郎中使君赴潤州序

皇帝臨軒盱食憂濟在人擇良二千石與之共理民有疾
苦得以安之吏有侵漁得以去之爲風化之本繫黎元之
命不其難哉故內外闕官自卿大夫以下多責成元輔唯
剖竹分符決在禁中又以政貴有成化難數易至於理行
超異公論當徵但增秩錫金或移典大郡而已由是我蕭
公建隼茲地化成五年漢庭羣公方待以右職而竟有南

徐之命蓋天子憂遠人而緩徵拜也公才可以濟物德可以化人五行之用備四時之氣足不立法而去弊不示禁而止奸寒者有衣飢者有食百城萬井若百草之得陽春不知其所以然而然也詔書既至公乃向闕北拜腰章遂行而徐之人望公如歸此邦之人去公如失千騎照路出於東郊男女滿野壺漿輻湊泣涕以送邀遮以留或攀我車或維我舟臨風鳴笳慷慨高秋君子是謂有古人之遺愛矣凡工文者能無詩乎

張僧繇畫僧記

天竺僧畫像者梁直閣將軍張僧繇之真迹也張公繪事之始厥有二僧後屬侯景師至金陵江南喪亂此畫流離散落多歷年所遂遭剖割分而爲二其一在唐故右常侍陸堅處卽此僧也陸公常嬰篤疾殆將屬纊忽於夢寐覩此胡僧謂公曰我有同侶一人自從離析已百餘年今在洛陽故城東李君家浚所寶玩舉世莫知若能爲我求之再得會合當以法力扶助令爾無憂陸公旣寤遂以求訪果如夢中之旨獲見斯人而僧亦俱在乃以俸錢十萬購而合焉卽日陸公疾瘳勿藥有喜信知造思之妙通於神

祇識者以爲干將鏌鋁散而復合亦其類也嗟乎陸公已
沒子孫不守有故姬驚之於市爲校書郎宋儋所得開元
中儋服藥過度因而喪明其李氏之僧復失所在惟入夢
者歸然獨存儋卒傳故人劉傑傑隱居少室不求聞達天
寶末遭祿山之難避地淮陰與道士魏審交淡相結納無
何傑以老卒傳於審交傳楚州刺史李湯湯傳睦州
司馬劉長卿今爲劉氏之寶藏矣

唐睦州司倉參軍盧公夫人鄭氏墓誌銘

有唐大曆十三年九月二十一日睦州司倉參軍范陽盧

公夫人鄭氏終於所寓之官舍享年四十八以其月二十九日盧公受命於元龜權厝於津德縣佩犢鄉之東原禮也夫人滎陽人也曾王父松皇朝魏州莘縣令王父行恩晉州臨汾縣令父叔衛州新鄉縣丞鄭氏之先家牒詳矣元魏以衣冠人物首出諸族之右者五姓我居其一世濟厥美史不絕書夫人卽新鄉府君第五女天姿淑德早有令聞中外推之難於擇對年十九以束帛墨車之禮遂歸於公在滎陽家號女師入涿州縣人稱婦道恭儉以事上柔順以逮下服澣濯躬勤勞山東士風於是乎在嗚呼偕

老斯闕從秩猶卑不及中年梧桐半死安仁悼亡之歎人
皆代而痛之一子一孫訴於彼蒼泣血而已銘曰
新鄉積善遂生淑媛詞邁克修乃光好仇母儀婦德萬古
千秋新安江水已矣東流

祭蕭相公文

維某年月日殿中侍御史劉長卿謹以清酌庶羞之奠敬
祭於故江州刺史相公蕭公之靈天降全德俾居元輔獨
立堂堂高視前古和氣同積英姿外舉草木陽春山川時
雨累葉當國同心事主業繼韋平世生申甫龍潛少海公

佐儲闡朝有奸臣動履危機十年調護不處嫌疑非以智
免則將禍隨國移大盜公陷虜圍忍受拘逼誓酬恩私苟
無所成雖死何爲果翻賊黨來赴王師懿夫川實朝宗雲
亦成龍天地再開君臣相逢獨持一心翊戴兩宮明略戡
難丹誠徇公輔國倭幸敢亂朝經潛申讜言請奪禁兵謀
泄隙開反爲所傾倉卒之際播遷無名東出招邱南浮洞
庭寄身滄江泛若流萍水國生疾災洲促齡瓊樹先落金
丹未成長卿自奉周旋於今五年才微顧重迹近位懸卽
之溫如望之儼然獎飭何厚招尋亦偏春山彩擷秋水洄

汾侯月舒嘯臨風扣舷懷舊如昨承歡眼前素業遂空清
風獨遠哀哀孝子行哭而反託體山阿古來誰免湘流垂
釣楚挽空吟明主思絕蒼生愛淡江南春草自古傷心想
像生平猶聞德音嗚呼哀哉去旌搖搖送馬蕭蕭長江遠
山暮暮朝朝山有歸雲江有回潮公之逝矣一言寂寥挂
劍於此魂兮可招尚饗

祭崔相公文

維年日月某乙謹以清酌之奠敬祭於故道州刺史相國
崔公之靈唯嶽降靈唯公佐時大國樑棟中朝羽儀清迥

玉立峩峩冰姿秋水見底寒松無枝天步艱難海內崩離
六合恟然一言安之帝憂南方公實載馳江漢之人惟公
是依持衡署吏按節臨師三軍感恩多士如歸何名高而
難恃翻寄重而先疑旋剖竹於滄海罷調梅於赤墀公頃
歸朝時逢出震體道而處忘機於進澹然一心獨立千仞
望重元老恩深顧問言必至公行惟周慎守孤直以見疾
觸姦邪而結釁公之爲善匪近於名公之在貴匪貪其榮
人皆畏黜公猶不驚飛鳥無迹白雲何情拜手魏闕退身
楚城北渚在途南風掩扇顧婆娑之樹老歌滄浪之水清

雖優閒而適性終卑溼而傷生嗟乎若以神之輔德將未
喪其正直若以天之愛人當復佐於陶鈞棄蒼生而不起
留清風以益振長卿昔忝初秩公之一顧謬廁當時之選
敢忘國士之遇旅櫬還鄉危旌啓路弔湘水而自波望長
沙而空暮嗚呼萬古今歸舟千里今東流過洞庭而搖落
出夏口而夷猶月蒼蒼兮江淼淼人不見兮猿獨愁徒髣
髴兮如在竟寂寥而若休尚饗

祭閻使君文

維年月日某乙謹以清酌之奠祭於故睦州刺史閻公之

靈猗歟我公誕靈中和盛德茂才如山如河玉立清迥冰
姿戔戔獨鶴不羣孤松無柯班氏九流孔門四科總而懷
之巨海長波遭時艱難避地江淹浙水之源剖竹來過百
城風偃萬室星羅感恩具存賞罰無頗帷褰訟止襁負肩
摩俗謠蔽芾庭顧婆娑沈侯高詠謝客疲痾人之云亡天
意若何故鄉道阻旅殯山阿哀哀孝子霜露滋多常懼流
年邱隴陂陀乃告元龜是宅是他嗚呼我公所悲則那今
去也哭昔來也歌引發東郊攀恩幡幡銘旌夕沒潸滄寒
莎緬懷生平持奉仁和感恩臨窆悲如之何尚饗

又祭閻使君文

維某年月日某乙謹以清酌之奠祭於故睦州刺史閻公
之靈天縱厚德曜於當代天與盛才宏夫濟世經綸萬類
磅礴六藝禮樂詩書自中形外玉山迴出瓊樹無對秦鏡
洞開吳鉤新淬青春立節白首彌勵五府交爭辟書相繼
九州分按無遠不屈所居則理其去懷惠焦心苦形興利
除害運屬橫流道猶未濟一麾出守萬里長逝故林之下
永閉龍泉埋沒於此經今幾年藹藹豐里油油原田田則
有稼公之闢焉里則有桑公之植焉我衣我食公實賜焉

人亡物在事往名傳滄海則變清風不愆長卿昔尉長洲
公爲半刺一命之末三年伏事愛我以文獎我以吏禮變
常儀恩生非次懷舊如在感今斯異身辱良知情依令嗣
中原多梗旅櫬猶寄挂劒傷心看碑墜淚東風應律草綠
川媚陽和發生物性咸遂冥冥逝者獨翳茲地空對一枝
音容髣髴尚饗

祭董兵馬使文

維年月日某乙謹以清酌之奠祭於故鎮守兵馬使董公
之靈溫溫董公純厚謙恭忠孝因心禮樂在躬薄伐襄漢

言從征東遠將偏師獨當羣凶朱旗薄霄白羽生風彼衆
我寡兵盡矢窮手張空拳力殫氣雄孟明失律李廣無功
有志不遂飲恨而終落梅笛怨細柳營空猶嘶戰馬永挂
良弓銘旌悠悠此去何從寶劒埋沒黃泉幾重尚饗

祭故吏行官文

維年月日某乙謹以清酌之奠祭於故吏行官某乙之靈
生也有涯天之常理悲夫逝者不得其死瞻彼行潦兮一
勺之水嗟爾浮生今千齡已矣憶昨金陵喪亂宣城危逼
王師有征將破殘賊我事戎旃爾爲羽翼實執鞭弭豈辭

筋力熊羆失利豺狼反顧衣冠四散余之南渡白刃向人
黃塵欲暮平生門闌皆已行路唯爾臨危秉心益固一身
相依千里徒步嗚呼故鄉何在旅櫬何歸蔓草春綠孤魂
夜飛心存簪履淚滿裳衣空餘旨酒以慰泉扉